



NEYTENDASTOFA

Ákvörðun nr. 42/2016

**Skilmálar við kaup á vefsíðu
Húsgagnahallarinnar, husgagnahollin.is**

I.

Málsmeðferð

1.

Í nóvember 2015 gerði Neytendastofa könnun sem snéri að því að skoða hvort íslenskar vefverslanir með húsgögn og annan húsbúnað uppfylltu skilyrði laga nr. 30/2002, um rafræn viðskipti og aðra rafræna þjónustu, laga nr. 46/2000, um húsgöngu- og fjarsölusamninga, auk laga nr. 57/2005, um eftirlit með viðskiptaháttum og markaðssetningu. Framangreind könnun var hluti af sameiginlegu átaksverkefni evrópskra stjórnvalda á sviði neytendaréttar, sbr. lög nr. 56/2007, um samvinnu stjórnvalda á Evrópska efnahagssvæðinu, og reglugerðum settum samkvæmt þeim. Tilgangur átaksverkefnisins var að kanna hvort vefverslanir á EES svæðinu uppfylltu ákvæði tilskipunar Evrópuþingsins og ráðsins 2011/83/ESB, um réttindi neytenda, sem jafnframt var höfð til hliðsjónar við skoðun Neytendastofu. Í ljósi þess að tilskipunin var í innleiðingarferli hér á landi en hafði tekið gildi í öðrum ríkjum Evrópska efnahagssvæðisins taldi Neytendastofa rétt að kanna upplýsingar á vefsíðunum með tilliti til tilskipunarinnar en taka ekki ákvarðanir á grundvelli hennar fyrir hún hefði tekið gildi og benda vefverslunum á að brátt myndu ákvæði hennar taka gildi hér á landi. Tilskipunin var svo að fullu innleidd hér á landi með lögum nr. 16/2016, um neytendasamninga á meðan málsmeðferð stóð.

Með bréfi Neytendastofu til Húsgagnahallarinnar ehf., dags. 4. febrúar 2016, gerði stofnunin félaginu grein fyrir því að vefsíða þess, husgagnahollin.is, uppfyllti ekki öll skilyrði laga sem gilda um fjarsölu. Athugasemdir Neytendastofu snéru að því að ekki væri með skýrum og greinargóðum hætti greint frá rétti neytenda til að skila vöru innan fjórtán daga og fá vöruna endurgreidda án þess að tilgreina ástæðu, sbr. 5. tölul. 1. mgr. 5. gr., sbr. 1. mgr. 8. gr. laga nr. 46/2000.

Í bréfinu var jafnframt vakin athygli á því að vefsíðan uppfyllti ekki upplýsingakröfu i- og h-liða 1. mgr. 6. gr. og b-liðar 1. mgr. 11. gr. tilskipunar 2011/83/ESB sem lúta einnig að upplýsingum um rétt til að falla frá samningi. Neytendastofa muni ekki aðhafast vegna þeirra vankanta að svo stöddu sökum þess að tilskipunin hafi ekki verið innleidd.



2.

Svar barst með tölvubréfi, dags. 11. febrúar 2016, þar sem óskað var nánari upplýsinga vegna athugasemda Neytendastofu.

Með tölvubréfi Neytendastofu, dags. 19. febrúar 2016, var félaginu veittar nánari upplýsingar þar að lútandi.

3.

Með bréfi Neytendastofu, dags. 11. mars 2016, voru gerðar athugasemdir við að ekki hafi verið unnar breytingar á vefsíðunni. Var krafa Neytendastofu þar um því ítrekuð.

Þann 22. mars 2016 barst Neytendastofu tölvubréf þar sem fram kom að búið væri að gera úrbætur á vefsíðunni.

Með bréfi Neytendastofu, dags. 13. maí 2016, gerði stofnunin Húsgagnahöllinni grein fyrir að tekið höfðu gildi lög nr. 16/2016, um neytendasamninga, sem innleiddu ákvæði tilskipunar nr. 2011/83.

Í bréfinu kom fram að skoðun Neytendastofu á vefsíðu Húsgagnahallarinnar þann 9. maí 2016 hafi leitt í ljós að búið væri að gera viðeigandi breytingar á vefsíðunni með tilliti til laga nr. 46/2000, sbr. fyrri athugasemdir Neytendastofu. Hins vegar hafi ekki verið unnar úrbætur á þeim atriðum sem bent var á í bréfinu í tilefni tilskipunar 2011/83/ESB. Því bendi Neytendastofa á að samkvæmt g-lið 1. mgr. 5. gr. laga nr. 16/2016 skuli upplýsa neytanda um skilyrði, tímamark og tilhögun réttar til að falla frá samningi.

Í bréfinu kom fram að bærust stofnuninni ekki skýringar mætti búast við að tekin yrði ákvörðun í málinu.

Ekkert svar barst.

4.

Skoðun á vefsíðu Húsgagnahallarinnar, husgagnahollin.is, þann 18. ágúst 2016 leiddi í ljós að engar umbætur höfðu verið gerðar á vefsíðunni.

II.

Niðurstaða

1.

Neytendastofa skoðaði innlendar vefsíður seljenda húsgagna og annars húsbúnaðar sem lið í samvinnuverkefni evrópskra stjórnvalda árið 2015. Við skoðun á skilmálum og vefsíðu



Húsgagnahallarinnar, husgagnahollin.is, kom í ljós að ekki voru uppfyllt öll skilyrði laga sem snúa að upplýsingagjöf til neytenda um rétt þeirra til að falla frá samningi.

Við meðferð málsins voru unnar úrbætur á upplýsingum á vefsíðunni að því er verðar ákvæði laga nr. 46/2000, um húsgöngu- og fjarsölusamninga. Eftir gildistöku laga nr. 16/2016, um neytendasamninga, voru gerðar athugasemdir við að gera þyrfti frekari úrbætur á síðunni. Þær hafa ekki verið gerðar.

2.

Lög nr. 16/2016 gilda um samninga á sölu á vöru og þjónustu til neytenda þegar seljandi hefur atvinnu af því að selja vörur eða veita þjónustu. Í lögnum er annars vegar fjallað um upplýsingagjöf til neytenda vegna annarra samninga en samninga utan fastrar starfsstöðvar og fjarsölusamninga en hins vegar er fjallað um réttindi neytenda sem og upplýsingaskyldu vegna samninga utan fastrar starfsstöðvar og fjarsölusamninga.

Samkvæmt 1. mgr. 5. gr. á neytandi rétt á upplýsingum innan hæfilegs frests áður en samningur utan fastrar starfsstöðvar eða fjarsölusamningur er gerður um þau atriði sem tiltekin eru í staflíðum a-s. Samkvæmt g-lið ákvæðisins á neytandi rétt á upplýsingum um:

„skilyrði, tímamörk og tilhögun réttar til að falla frá samningi, ef hann er fyrir hendi, í samræmi við 1. og 2. mgr. 19. gr. lagana þessara, ásamt samræmdu stöðluðu uppsagnareyðublaði sem ráðherra gefur út í reglugerð,“

Almenn ákvæði um rétt neytenda til að falla frá samningi er að finna í 16. gr. laganna. Ákvæðið er svohljóðandi:

„Neytandi hefur fjórtán daga frest til að falla frá samningi utan fastrar starfsstöðvar eða fjarsölusamningi með tilkynningu til seljanda.

Neytandi þarf ekki að tilgreina neina ástæðu fyrir ákvörðun sinni að falla frá samningi og skal ekki bera neinn kostnað annan en þann sem kveið er á um í 3. mgr. 21. gr., 22. gr. og 23. gr. þessara laga.

Á neytanda hvílir sönnunarbyrði um að seljanda hafi verið tilkynnt um ákvörðun um að falla frá samningi.“

3.

Við meðferð málsins hefur skilmálum á vefsíðu Húsgagnahallarinnar verið breytt á þá leið að nú segir þar m.a.: „Viðskiptavinur hefur heimild samkvæmt lögum nr. 46/2000 um húsgöngu og fjarsölusamninga að skila vöru innan 14 daga og fá endurgreitt án þess að tilgreina nokkra ástæðu að því gefnu að varan sé í upprunalegum umbúðum“ auk „Óski viðskiptavinur eftir að skila vöru sem hann hefur áður keypt, innan 14 daga, ber hann kostnaðinn af því að koma vörunni aftur til seljanda hvort sem er með pósti eða öðrum liðum.“ Í skilmálum koma ekki fram upplýsingar um það hvernig 14 daga frestur sé fundinn út.



Í skilmálum er ekki að finna leiðbeiningar um það hvernig neytandi skuli haga tilkynningu um að hætt sé við kaup en undir liðnum „Skila vöru“ á vefsíðunni segir m.a.: „Ef skila eða skipta á vöru er hægt að fá nánari upplýsingar í Húsgagnahöllinni, Bíldshöfða 20, 110 Reykjavík, eða í síma 558-1100“ auk þess sem þar er að finna skilaform. Í umræddu skilaformi er m.a. farið fram á upplýsingar um ástæðu skila.

Eins og fram hefur komið við meðferð málsins féllu lög nr. 46/2000, um húsgöngu- og fjarsölusamninga úr gildi með gildistöku laga nr. 16/2016. Fyrirnefndu löggin eiga því ekki lengur við um samning seljanda og neytanda í fjarsölu.

Samkvæmt 16. gr. laga nr. 16/2016 hefur neytandi fjórtán daga frest til að falla frá samningi utan fastrar starfsstöðvar eða fjarsölusamningi án þess að tilgreina neina ástæðu fyrir þeirri ákvörðun sinni. Meginreglan, skv. 17. gr., er sú að frestur til að falla frá samningi rennur út fjórtán dögum frá því að gengið var frá samningi eða neytandi tók vöru í sína vörslu, ef sá dagur er síðar. Frestur getur ekki reiknast frá þeim tíma áður en neytandi hafði tók á að veita hlutum viðtöku, þegar um sölu á vöru er að ræða. Réttur til að falla frá samningi er ekki afdráttarlaus og er fjallað um undantekningar hans í 18. gr. laganna. Nánari ákvæði um framkvæmd og þýðingu þess að nýta réttinn er að finna í 19.-23. gr. laganna.

Með vísan til framangreinds hefur Húsgagnahöllin brotið gegn g-lið 1. mgr. 5. gr. laga nr. 16/2016 með því að veita ekki fullnægjandi upplýsingar um tilhögun við að nota réttinn til að falla frá samningi, þ.e. hvert neytandi skuli beina kröfu sinni og frá hvaða degi frestur til að falla frá samningi reiknast. Húsgagnahöllin hefur jafnframt brotið gegn 16. gr. með því að fara fram á að neytandi veiti upplýsingar um ástæðu skila í rafrænu formi á vefsíðunni.

Með vísan til 3. mgr. 27. gr. laga nr. 16/2016 beinir Neytendastofa þeim fyrirmælum til Húsgagnahallarinnar að koma upplýsingum um rétt neytenda til að falla frá samningi og tilhögun skila á vefsíðunni husgagnahollin.is í rétt horf í samræmi við ofangreint.

Húsgagnahöllin skal fara að fyrirmælum Neytendastofu um að koma upplýsingum um rétt neytenda til að falla frá samningi í rétt horf. Verði það ekki gert innan tveggja vikna frá móttöku ákvörðunar þessarar skal Húsgagnahöllin greiða dagsektir í samræmi 3. mgr. 29. gr. laga nr. 16/2016 að fjárhæð 30.000 kr. (þrjátíuþúsundkrónur) á dag þar til farið hefur verið að ákvörðun Neytendastofu. Sektarfjárhæðin er ákveðin með mið af meðalhófsreglu stjórnslulaga, umfangi brotsins og fjárhæðum dagsekta í öðrum ákvörðunum Neytendastofu sem og að teknu tilliti til samstarfsvilja félagsins á fyrri stigum málsins.



III.

Ákvörðunarorð:

„Húsgagnahöllin ehf., Bíldshöfða 20, Reykjavík, hefur brotið gegn g-lið 1. mgr. 5. gr. laga nr. 16/2016, um neytendasamninga, með því að veita ekki fullnægjandi upplýsingar um tilhögun við að nota rétt til að falla frá samningi.

Húsgagnahöllin ehf. hefur brotið gegn 16. gr. laga nr. 16/2016, um neytendasamninga, með því að krefja neytendur um ástæðu skila í rafrænu formi á vefsíðu sinni.

Með vísan til 3. mgr. 27. gr. laga nr. 16/2016 beinir Neytendastofa þeim fyrirmælum til Húsgagnahallarinnar ehf. að koma upplýsingum um rétt neytenda til að falla frá samningi og tilhögun skila á vefsíðunni husgagnahollin.is í rétt horf.

Verði ekki farið að fyrirmælum Neytendastofu innan tveggja vikna frá móttöku ákvörðunar þessarar skal Húsgagnahöllin ehf. greiða dagsektir í samræmi við 3. mgr. 29. gr. laga nr. 16/2016 að fjárhæð 30.000 kr. (þrjátíuþúsundkrónur) á dag þar til farið hefur verið að ákvörðun Neytendastofu.“

Neytendastofa, 2. september 2016

Tryggvi Axelsson
forstjóri

Þórunn Anna Árnadóttir